

Van Hemert en Rauch span saam



Ilse van Hemert

Deur Marguerite Robinson

WANNEER 'n mens die talente van twee uitsonderlike vroue saamgooi, be-
loof die eindproduk om 'n verrassing te
wees. Enersyds is daar die vernuwende
regisseur Ilse van Hemert en andersyds
die veelsydige sanger Laurika Rauch.
En die finale produk sal 'n musiekmas-
karade wees.

Volgens Van Hemert is die beskry-
wing "musiekmaskarade" die naaste
aan wat gehore te wagte kan wees – nie
ligte musiek nie, nie kabaret nie en
beslis nie net sang nie.

Die projek is ook nie net dié van die
twee vroue nie. Die kunstenaar/drama-
turg/liriekskrywer Pieter J. Swanepoel,
die musiekverwerker Peter McLea en
die akteur/sanger Philip Moolman is
ook betrokke by dié uitsonderlike aan-
bieding wat in November deur Truk op
die planke gebring word.

Sedert die opvoering van *Met permis-
sie gesê* het Van Hemert nog altyd geglo
die speeltalente van Rauch is nog nie na
behore ingespan nie. Rauch het op haar
beurt nog altyd hoë agting gehad vir die
besondere werk wat Van Hemert doen.
Om eendag saam te werk aan 'n unieke
projek was net 'n kwessie van tyd.

Van Hemert glo die musiekmaskara-
de sal 'n verrassing wees vir Rauch-
aanhangers. "Dit kan dalk die bekende
gehore onkant vang, maar miskien sal
dit haar aan 'n breër of self nuwe gehoor
bekend stel."

Van Hemert wil die maskarade in die

styl van 'n pop-video aanbied. Tematies
gaan dit oor die drome, hoop én nagmer-
ries van een vrou in die loop van 'n nag.
En dit is hier waar Moolman ook in
verskillende gedaantes sal verskyn.

Met só 'n aanbiedingstyl kan daar na
hartelus gespeel word met sang, mas-
kers en visuele hulpmiddels soos skyfies.
Iets waarmee Van Hemert in *Die man in
die blou maan* geëksperimenteer het en
wat hier verder gevoer kan word. 'n
Groot verskil is dat sang 'n integrale
deel van die opvoering sal uitmaak.

Meesste van die liriek, monoloë en
dialoë is reeds deur Swanepoel geskryf,
maar die musiekverwerkings moet nog
gedoen word. Swanepoel was terloops
ook betrokke as liriekskrywer by *Man in
die blou maan*, terwyl McLea van die
verwerkings op Rauch se jongste plaat
Stuur groete aan Mannetjies Roux ge-
doen het. In dié stadium is daar nog nie
op 'n naam vir die musiekmaskarade
besluit nie.

Vir Van Hemert bied dié jongste
projek die geleentheid om Rauch as 'n
speler te ontgin, terwyl sy ook haar hand
kan waag aan die uitdagings wat sang as
die hoofkomponent van 'n produksie aan
'n regisseur stel. "En dit met een van die
beste sangers in die land."

Maar die proses om by 'n nuwe eind-
produk uit te kom, is nie 'n maklike een
nie. "Ek is bang – soms raak ek vrek
bang vir my eie kop." Maar as 'n bewese
regisseur en met al die ander talente
daarby, kan dit net nog 'n belewenis vir
Suid-Afrikaanse gehore wees.



Laurika Rauch